



## UMP kumpul dana MyGift 1.8 juta untuk Endowmen Biasiswa Pelajar

Universiti Malaysia Pahang (UMP) meraikan warganya dalam meningkatkan produktiviti, kualiti kerja, keikhlasan sumbangan dan kecemerlangan perkhidmatan dalam merealisasikan dua agenda perdana iaitu inisiatif *MyGift* dan penarafan autonomi untuk UMP.

Majlis dirasmikan Naib Canselor UMP, Profesor Dato' Dr. Daing Nasir Ibrahim yang turut dihadiri Timbalan Naib Canselor (Akademik & Antarabangsa), Profesor Dato' Dr. Rosli Mohd Yunus, Timbalan Naib Canselor (Hal Ehwal Pelajar & Alumni), Profesor Dato' Dr. Yuserrie Zainuddin, Penolong Naib Canselor (Hal Ehwal Korporat & Kualiti), Profesor Dato' Dr. Ishak Ismail dan Pendaftar, Abd Hamid Majid.

Seramai 160 orang dirai dalam Majlis Apresiasi *MyGift* dan Jawatankuasa Pelaksana Audit Kesyediaan Autonomi UMP yang berlangsung di Hotel Royale Ancasa Pekan pada 20 Julai 2016 yang lalu.

Profesor Dato' Dr. Daing Nasir Ibrahim berkata, Kelestarian Kewangan merupakan salah satu Bidang Keberhasilan Utama Universiti dan Lonjakan Strategik yang kritikal untuk UMP.

Justeru, atas kesedaran tersebut dan realiti pembiayaan geran kerajaan terhadap operasi universiti, pihak pengurusan melihat bahawa sumber-sumber kewangan dan kekayaan baharu perlu diteroka sendiri oleh UMP bagi manfaat kelestariannya dalam tempoh jangka panjang.

"Dalam konteks sektor pendidikan tinggi global, endowmen merupakan satu bentuk dana kewangan dan rizab aset yang diagregasikan sesebuah universiti untuk menyokong dan membiayai misi pendidikannya secara konsisten daripada sumber-sumber yang diperoleh daripada penyumbang individu dan korporat.

"Dengan strategi promosi dan advokasi yang proaktif serta insentif nilai yang atraktif kepada kelompok penyumbang, endowmen berupaya menjana dana kewangan dan rizab aset yang

amat signifikan kepada sesebuah universiti," katanya.

Ujar beliau, realiti ekonomi semasa dan komitmen kewangan Kerajaan Persekutuan serta status autonomi yang dimiliki UMP kini telah turut mencabar untuk mendakap inisiatif *MyGift* sebagai nadi pertumbuhan endowmen secara proaktif. Malah pihak Kementerian Pendidikan Tinggi (KPT) turut meminta semua Universiti Awam (UA) untuk meneroka prospek endowmen seoptimum mungkin bagi mengurangkan kebergantungan kewangan mereka kepada sumber Kerajaan Persekutuan semata-mata.

Selain itu, katanya inisiatif *MyGift* harus juga lestari dalam kerangka strategik yang terancang dan terarah. Untuk itu, usaha yang proaktif perlu dilakukan untuk mengumpulkan sumbangan daripada pelbagai sumber untuk dimanfaatkan oleh universiti ini bagi tujuan tajaan pengajian dan peningkatan fasiliti dan kualiti akademik di UMP.

Dato' Dr. Daing Nasir berkata, satu daripada tabung tersebut ialah Endowmen Biasiswa Pelajar dan pihak pengurusan amat menghargai komitmen yang telah diperlihatkan oleh Pusat-pusat Tanggungjawab untuk memudahcara penyaluran sumbangan kepada endowmen ini bagi manfaat mahasiswa UMP yang menghadapi masalah kewangan yang tulen.

Buat pertama kalinya, Lembaga Pemegang Amanah *MyGift* telah bersetuju meluluskan skim tajaan biasiswa untuk mahasiswa baharu yang akan mendaftar bagi Sesi Akademik 2016/2017.

Biasiswa ini akan diberikan kepada 10 mahasiswa yang mempunyai latar belakang keluarga yang miskin tetapi memiliki keputusan yang cemerlang untuk meneruskan pengajian di UMP.

Melalui inisiatif *MyGift* juga, satu skim bantuan insentif pendidikan bernilai RM 1,000 juga telah diluluskan untuk manfaat para mahasiswa baharu yang menghadapi masalah kewangan.

Bantuan akan disaring di peringkat Jabatan Hal Ehwal Pelajar & Alumni bertujuan membolehkan para mahasiswa baharu yang mempunyai masalah kewangan yang mendesak menyediakan keperluan-keperluan berkaitan bagi memulakan pengajian di sini.

Lain-lain program dalam usaha membantu mahasiswa termasuklah Kongsi Rezeki, *Food For All*, kupon makanan, pengagihan zakat dapat terus dilestarikan serta lain-lain manfaat.

Dalam majlis ini, sebanyak 1.8 juta disumbangkan setiap jabatan dalam usaha menyokong inisiatif *MyGift* bagi Endowmen Biasiswa Pelajar.

Pada masa yang sama, UMP turut meraikan warga universiti yang sentiasa memberi komitmen dalam usaha mendapatkan penarafan autonomi.